

一聽便解處決不差卒年七十餘輟朝三日賜禮葬贈謚襄武
三子河沮澤○命司諫院署護軍趙珠告身召正言文中庸問
曰趙珠於壬午九月受護軍何不署告身中庸對曰前等不署
故臣等亦不敢署上曰當論是非豈可徒視前等也哉珠乃
功臣子弟武士之傑者故命除是職○庚申新置鑄字所上
慮本國書籍鮮少儒生不能博觀命置所以藝文館大提學
李稷摠制閔無疾知申事朴錫命右代言李膺為提調多出內
府銅鐵又命大小臣僚自願出銅鐵以支其用○日本大相
國大內殿一歧島志佐殿對馬宗島宗府郎等使人告還各賜
物厚於所獻○癸亥太白晝見夜東方有赤氣○丙寅行醮於
昭格殿禳災變也○丁卯取漫散軍所買馬王迷失帖言今天
下已一家何以取漫散軍之馬乎館伴對曰天下一家何以推
漫散軍乎迷失帖乃笑李茂以啓上哂之曰逃軍何必枚舉
而與之乎宜以錄名者與之○戊辰誅咸升復升復官者與於
趙思義之亂者也○庚午御經筵始覽十八史○三府議定都